

# SCRIPTA

---

**Numéro Scripta** : 5342

**Auteur(s)** : Cotentin (bailli)

**Bénéficiaire(s)** : Gautier de Chambly, Cotentin (archidiacre)

**Genre d'acte** : charte

**Authenticité** : non suspect

**Datation** : 1283, 28 mai

**Action juridique** : autre

**Langue du texte** : ancien français

## Analyse

Lucie la Cambière vend à Gautier de Chambly, archidiacre du Cotentin, pour huit livres tournois et une rente annuelle une maison de la paroisse de Valognes, située devant le tribunal (cohue).

## Tableau de la tradition

### Éditions principales

a. Fontanel Julie, *Le cartulaire du chapitre cathédral de Coutances*, Saint-Lô, Archives départementales de la Manche (Sources inédites sur l'histoire du département de la Manche ; 1), 2003, n° 85, p. 205-206.

Texte établi d'après a

A tous ceulz qui cez presentes lettres verront et oront, le baillif de Costentin, saluz. Nous vous faisons assavoir que, par devant nous establie en droit, Luce la Cambiere, dite la Haslee, recongnut de sa bonne volenté, sans contraignement, que elle avoit vendu, ottrié et delessié en perpetuel afin et a tousjours maiz a homme honorable et discret maistre Gautier de Champli, archediacre de Costentin, une meson que elle avoit en la parroisse de Valoignes, assise entre la maison Guillaume le Polein d'une partie et la maison Raoul Pilaice de l'autre, o toute la place ou lad. estoit assise, si comme elle se porporte, de la voie que est devant la cohue ou l'en plaide et la gaule le roy jusquez a l'autre voye qui est devant la maison Robert le Breton. Ce est assavoir pour oict livrez de tornois, que lad. Luce a eu et receu dud. archediacre ou de son commandement et s'en tint par devant nous plenierement pour bien paieé, a tenir et a avoir par droit, heritage, a pourseer la vente devant dite en perpetuiey bien et em pees, sans contredit, aud. archediacre et a sez hoirs de lad. Luce et de sez hoirs, sans reclamation et sans empeschement, et a estre fez dez ore en avant de lad. Luce ou de sez hoirs en icelle vente ; et a jurey sus sains lad. Luce de sa bonne volenté, sans contraignement, par devant nous que elle ne demandera ne ne reclamera ne ne fera demander ne reclaimer riens en temps advenir en lad. vente par aucune cause ne par aucune raison et que elle n'yra jamais encontre led. archediacre ne encontre ses hoirs ne ne fera aler par cause ne par raison de lad. vente en nulle masniere ; et quant a cen tenir garder, aemplir et enterigner en perpetuiey en bonne foy aud. archediacre et a ses hoirs, lad. Luce a obligié par devant nous soy et ses hoirs a garantir, delivrer et deffendre lad. vente aud. archediacre et a ses hoirs tousjours mais contre touz, envers touz et en touz lieux, franchement, delivrement, quittement et paisiblement, sans contredit et sans empeschement, et a eschanger icelle vente aillours en lour propre heritage aud. archediacre et a ses hoirs, value a value, avenamment, egaument et leaument, toutez les fez que mestier en seroit, en tel maniere que led. archediacre et sez hoirs acquitteront et delivreront [pour lad.] vente chacun an en perpetuiey vers la chief seigneurie qui lui est deu anuelement [...] de rente sur lad. vente ; et quant a cen tenir, garder et aemplir en perpe[tuitey sans] empeschement et sans malice, si comme il est dessusd., la devant dite Luce a renucié par devant nous, de sa bonne volenté et sans contraignement, expressement, a tout privilege de croiz prise et a prendre, a tout usage et a tout coustume de terre, a touz escripz donnez et a donner, a exception de droit

et de fait et a toutes autres exceptions, deffenses et a toutes autres choses qui pourroient valoir et aider a lad. Luce et a ses hoirs et aud. archediacre et a ses hoirs nuire a la vente et as convenans dessusd. encombrer et empescher. En tesmoing de laquelle chose et que ceste vente vaille et soit ferme et estable par tous temps advenir, nous avons selley ces presentez lettres du seel de la baillie de Costentin, ensemble avec le seel a lad. Luce, a la requete des parties, sauve la droicture notre seigneur le roy de France et a touz autres. Ce fut fait l'an de grace mil CC IIIxx et troyz, eu moys de may, le vendredi emprés la feste saint Urbain apostole et Martin.